

COMUNICATO n. 1821 del 01/07/2025

De vourtschbinnen barn iaz tschatzt kemmen van internazional praisgericht

Argealpprais 2025, tschèrlt de pestn van Trentin

[Mòcheno] Gem bèrt en de projektn as leing en earste plòtz ont en an ausòndern, original ont bidernomòchen vurm de òrbetaussicht en de jungen as lem en de alpinelander: der doi der tema en de mitt van Argealpprais 2025, bail en jor va de presidenz va de autonome Provinz va Trea't, as iaz ist en lebet va de tschèrl en òlla de lander as toalnemmen en de òrbetgamoas'chèft.

De lokalgerichtn hom se zòmmpfuntn ver za schatzn de vourstelln van schualn, van bèrkn ont van start-up ont der Trentin hòt tschèrlt za stelln vour abia de pestn toalnemmer vour en internazional praisgericht de projektn vourstellt van designer Alessio Ramundo, pet "ADES - Gem zaruck der bèrt va de hòntbèrk ver za gem zukunft en de pèrng van Trentin" ont van Istituto Tecnico Economico-I.T.E. Antonio Tambosi va Trea't pet en "Projekt Valle dei Laghi".

De internazional praisgericht bou as toalnemmen auskennetalait ver òll Lònt (Balschlònt, Osterraich, Taitschlònt ont Schbaiz), bart tschèrln de gabinger vour de mitt van leistung ont de praisvaier bart kemmen gamòcht bail de 56a Zòmmtreff van Arge Alp Stòtt Viarer en programm ka Trea't as de draiaontzboa'sk ont as de viaraontzboa'sk van schanmikeal 2025.

En de drai pestn projektn ver òll oa'na van zboa kategori tschrim asn bando barn kemmen gem de 10.000 euro van praisgèlt: 2.500 euro ver en earste plòtz, 1.500 euro ver en zboate plòtz ont 1.000 euro ver en dritte plòtz.

Do unt n a zòmmsetz van projektn as sai' kemmen tschèrlt.

"ADES - Gem zaruck der bèrt va de hòntbèrk ver za gem zukunft en de pèrng van Trentin"

Projekt vourstellt van Alessio Ramundo ver de kategori "Bèrkn ont start-up".

Turch de zòmòrbet zbischn de designer, de hòntbèrker ont de lokalgamoas'chèftn, der projekt bill unterstützn s mòchen de mobln ont s zaig va holz ont va laimet pet èchta vorm ont natural materialn. Der nu'm "ADES", as trentiner bill song "iaz", s doi unterstraicht de noat za miasn eppes tea'. Der projekt bill nèt lai eppes herrstelln ober der bill learnen, u'learnen ont aupaun zòmmpintn as tauern en de zait. S ist an paispil as men mu' bider prauchen as gip bèrt en de pèrng abia plòtz bou za lem, nèt lai za denken. Turch a zòmòrbet pet de tischler ont de lokal schnaideren, barts moglechkait sai' za probiarn dirèkt en de boteing. ADES unterstützt s augea' va kloa'na bèrkn, zòmòrbetn zbischn designer ont hòntbèrker. S sai' sechen de umbèlt ist voursichte ont pet an nidern effekt. De materialn as kemmen praucht, abia s holz ont s laimet, sai' natural, van plòtz ont men konnt sa bider prauchen. Derzua kemmen aupaut intergenerazionaln ont òrbet nètzn as versterchern s hearn se toalnemmer ont s lem van jungen asn lònt. Der zòmmpint pet de pèrgplatz ist nèt lai va aussicht, ober ver de birtschòft, ver de u'lear ont ver en sozial aa.

"Projekt Valle dei Laghi"

Vourstellt van Istituto Tecnico Economico-I.T.E. "Antonio Tambosi" va Trea't ver de kategori "Schualn", schualviarer Andrea Bezzi.

Der projekt, as tauert zboa jor, sicht de pèrngplatz abia platz za gem en bèrt ver za meing mòchen lòntmarketing ont asou organisian sporttrèffn aus van sai'na zaitn en Valle dei Laghi. S nimmp toal de

droitte klasse van adrèss Turismus pet richtung “manager van pahòltechsport” as hòt u’gaheift a morfologische ont hidrografische, storische, sozial-birtschòft untersuach va de lòntschòft ont a suach van monumentn as nou hom a storische bichtekait. Nou, s kimmip gem voursicht en de offetkait, en de innhòltkait ont en de pahòltechkait. De untersuach keart en an ettlèna sport, men hòt nou vour za gem bèrt en bider ausrichtn de pahalter as sai’ en òltn zentrum van derver, zòmm pet en network OSPITAR, pet en zil za gem ompòrt en an pahòlteche vurm en de turistn. Asou za meing gem naia moglechkaitn ver an “lonksom” turismus ont naia moglechkaitn va òrbet ver de jungen. Der projekt kimmip raicher pet en gilt gem en de hòntbèrkprodukt, abia der Bai’, s extravergine eil, der kas, s vlaisch, de fruchtn ont der hu’ne.

Arge Alp ist an òrbetgamoas’chòft gagrunt as de zbelva van schanmikeal 1972 ka Mösern en Tirol, pet en zil za stitzn de neat van alpineplatz as enteressiarn ungefèr secksaontzboa’sk milionen va lait. S sai’ toalnemmer va Arge Alp s Taitschlònt pet en Vraistòtt va Baiern, s Osteraich pet de Länder van Vorarlberg, van Tirol ont va Sòlzburg, s Baltschlònt pet de autonome Provinzn va Poazn ont va Trea’t ont de Region Lombardia, de Schbaiz pet de Kantonen van Grigioni, van San Gallen ont van Ticino.

Download van vrong [do](#)

<https://www.youtube.com/watch?v=g9Xqq2qv2OE>

<https://www.youtube.com/watch?v=t3tc0cTMYpk>

Ibersetz gamòcht van Sprochtirl va de Tolgamoas’chòft Hoa Valzegu’ ont Bersntol

(cdt)